

## Te Guijtz Nani Biääd Loj Reben Hebreë

### *Agunii Xi'n Dios xtidx Xtadni*

<sup>1</sup> Nen redxe galoo garen-garen mood guninäj Dios retoxtadgoldoonu. Xhidajlza huält guniini por reniguii ni bacuaa xtiidxni. <sup>2</sup> Nen redxejre aguniini loonu por Xi'nni, lojzani badeed Dios yäl̄rnibee guncheeni guedxliujre, badeedzani guira'ti lojni. <sup>3</sup> Laani najc xtuxh xten xcäl̄rdimbicha' Dios, laani najczani sigajc najc Dios, laazani rapchee guira'ti con xtiidxni ni rnibee. Cheni gulujx basiani xtoj̄l̄nu, gurejni xladbee Gueb Dios xhaguibaa te canibeeni.

### *Sacduxhru Xi'n Dios loj rexangl Dios*

<sup>4</sup> Ro'c gurej Xi'n Dios sa'csi sajcruni loj reangl xten Dios, sa'csi acua'ni yäl̄rnibee si'c te bejn̄ ni riannäj xhixten Xtadni. Lajzani sajcru lo relaj rexangl Dios. <sup>5</sup> Sa'csi Dios di niäjb loj nicla tej rexangl̄ni:

Luj najclu Xi'nä. Narä guleälu te guinibeelu.

Dizani niäjb xcuent nicla tej rexangl̄ni:

Narä gacä xtadni, laani gacni xi'nä.

<sup>6</sup> Niluxh che biädnäni Xi'n xtebni lo guedxliuj, guniini:

Guiraa rexangl xten Dios, ¡Colgañ Xi'nä!

<sup>7</sup> Che gunii Dios xcuent rexangl̄ni räjpni:

Rujnni ruxhun̄ rexangl̄ni si'c bej, rujnni rbebajl  
rexmosni.

<sup>8</sup> Niluxh xcuent Xi'nni guniini:

Luj najc Dios.

Nabajnlu par tejpas;

xcälrnibeelu par tejpas najc te yälrnibesa'c.

<sup>9</sup> Ahuinälajzlu xhigabsa'c, dipaclu nichaglazj xhigabguijdx,

ni'cni Dios ni najc Xtioslu, baniidxru yälrbalajz lojlu quela loj resa'lu.

<sup>10</sup> Rniizani:

Luj, Dad, che guslojli bencheelu guira'ti,

bencheelu cad soob guedxliuj, ñaazalu bencheelu reguibaa.

<sup>11</sup> Laareni sinitlojreni, niluxh luj nabajnlu par tejpas.

Guiraareni siujx si'c riuix te lajd.

<sup>12</sup> Suse'tlureni si'c rie't te la' lajd, sidxaareni si'c rdxaa te lajd.

Niluxh luj dilu guidxaa.

Lalgajtis nabajnlu, di rexijzlu ted.

<sup>13</sup> ¿Gucxha räjp Dios lo te xanglni scree, ä? Räjpni:

Gurej xladbeä te guinibeelu dxejli cheni gudzugä guiraa ni rdxe'ch lojlu ladz ni'lu.

<sup>14</sup> Guiraa rexangl Dios najc sprit, ruxhal Diosreni te chayacñajreni rebejn ni xca' yäl nabajn par tejpas.

## 2

### *Na'c gusaanni diidx ni ruslaani lo dojl*

<sup>1</sup> Ni'cni nanab jiunu xtidx Dios ni abiejn diajgnu, te na'c guibicajnu lo xnezyujni. <sup>2</sup> Anajntu aguzojb diidx ni gunii rexangl Dios neñ redxe galoo. Luxh reni di nusoob diidxga bejnreni dojl, dxejc bateed Diosreni trabajw. <sup>3</sup> ¿Xho gac guibicaj xcäl naj Dios yejcnu palga dinu jiu rextidx Dios

xcuent yäl<sub>r</sub>us<sub>l</sub>aa lo dojl, ä? Ni Dad, Jesucrist basa'n diidxga lo rexpejn<sub>p</sub>acni, dxejc laareni basule'reni rediidxre loonu. <sup>4</sup> Niluxh Dios baluii najc diidxga guliipac sa'csi bejn<sub>n</sub>i reseen, näjza yäl<sub>r</sub>dxeloduxh, näjza xhidajl remilagr<sub>w</sub>. Badeedzani Sprit D<sub>x</sub>an xtenni loj renani ahuililajz xtiidxni te gun tejgareni garen-garen xtz<sub>u</sub>unreni si'ctis ni r<sub>l</sub>ajz Dios gunreni.

*Nani guläxtiej yäl<sub>r</sub>us<sub>l</sub>aa bejn lo dojl*

<sup>5</sup> Di Dios gudeed yäl<sub>r</sub>nibee lo rexangl<sub>n</sub>i te guinibeereni guedxliucoob ni cagusä'tnu n<sub>aj</sub>.

<sup>6</sup> Guyu' tej ni bacuaa xtid<sub>x</sub> Dios lo guijtz, räjp<sub>n</sub>i:

¿Chu najc niguii, te guinalajz Dios laani?

¿Chu najc xi'n niguii te jädhuizaluni?

<sup>7</sup> Nagabsi dxej guxiiru saj<sub>n</sub>i lo reangl xhaguibaa, dxejcti badesaclu xcäl<sub>n</sub>asa'cni,

badesaclu xpala'nni,

badeedzalu yäl<sub>r</sub>nibee lojni te guinibeeni guira'ti ni bencheelu.

<sup>8</sup> Badeedlu guinibeeni guiralii ni yu' lo guedxliuj. Cheni badeed Dios guira'ti te guinibeeni, xhetliidi basa'n Dios ni digacdi guinibeeni, niluxh n<sub>aj</sub> ruhuiinu gajdni guinibee guiralii ni'c. <sup>9</sup> Alga rhuiinu Jesucrist, ni bejn Dios guxiiru saj<sub>n</sub>i lo reangl xten Dios che guyu'ni lo guedxliuj balsi dxej. Che baluux Jesucrist xtz<sub>u</sub>unni lo guedxliuj, badeed Dios yäl<sub>r</sub>dimbicha' näjza xpala'nni lojni. Sa'csi sanälajz Dios nuurnu basaanni gudejd Xi'nni trabajwduxh, gujtni lacuaa niejtnu.

<sup>10</sup> Dios benchee guiralii ni yu' lo guedxliujre, n<sub>aj</sub>li rnibeeza Dios guira'ti. Luxh Diosre r<sub>l</sub>ajz chanäni xhidajl xi'nni xhaguibaa, ni'cni baxhal

Dios xi'npacni Jesucrist te guläxtiejni yälruslaa bejn lo dojl che gudejdni trabajwduxh lo crujuj. <sup>11</sup> Sa'csi Jesucrist, ni rujn chasanäj bejn te yäl'nabaña, näjza reni risanäj yäl'nabaña, tejtis najc xtadreni. Ni'cni di Xi'n Dios guitujy guiniini lojreni: “betzä”.

<sup>12</sup> Scree caj lo xtidx Dios:

Chasule'ä lo rebetzä xho najclu,  
siliä'päza xpala'nlu lojreni.

<sup>13</sup> Räjpzani:

Sibäzä gacnäjä Dios narä.

Ste lajt guniini:

Bahuii loä näjza rexi'nä ni baniidx Dios loä.

<sup>14</sup> Te famil najc tejsi bääl, tejsiza rejn; ni'cni che biääd Jesucrist lo guedxliuj guyu' tiejxhni näj xtiejnni si'c beṅgedxliuj, gujtzani te gujc bejnni gunijt nani rnibee yälgujt, nalajznu, beṅdxab. <sup>15</sup> Te si'c baslaani guiraa reni rdxejb yälgujt, najcreni si'c reni yu'tis loj xlamni guideb nabajṅreni, lacti rdxejbreni yälgujt. <sup>16</sup> Guliini dini niääd te gacnäjni reangl xten Dios, biäädni te gacnäjni guiralii rexajg toAbram. <sup>17</sup> Ni'cni gujcnı si'cpac te bejtznu, te gac gacni te bixhojz xten Dios ni rulaslajz, te bixhozsa'cza xten Dios, si'cni rlajz Dios gacni te guslaani rebejn lo dojl. <sup>18</sup> Sa'csi lagajc laani gudejdni trabajw, luxh baquiilza beṅdxabni niujnı dojl, ni'c naj sajg gacnäjni renani ruquiil beṅdxab gun dojl.

### 3

#### *Jesucrist sajcro loj Moisés*

<sup>1</sup> Ni'cni bejtznu, reni anabansa'c, sa'csi najctu reni gurejdx Dios gac xi'nı, colyembee Jesucrist ni

baxhal Dios loonu. Laani najc bixhojz ni sajcro, rusule'zani xtidx Dios xcuent nani ahuililajznu. <sup>2</sup>Laani huinuutis guyu'ni lo Dios ni guleni te gunni dzuunre. Sigajc ni bensa'c toMoisés xtzuun Dios che guyu'ni loj rexpejn Israel, sigajcza bensa'c Jesucrist dzuun che biäädni lo guedxliuj. <sup>3</sup>Sigajc ni yu'ru xpala'n dad lo xpala'n rexi'nni, sigajcza yu'ru xpala'n Jesucrist lo xpala'n toMoisés. <sup>4</sup>Yu' xtad guiraa refamil lo guedxliuj, niluxh gule'c Dios guiralii bejn, bencheezani guedxliuj. <sup>5</sup>Basoob Moisés diidx si'c te mos, cuanäjni rexpen Dios si'cni gunibee Dios gunni, te baluiini xho gac redzuun ni gajd gac dxejc, luxh naj agujc redzuinga. <sup>6</sup>Niluxh Jesucrist basoob diidx si'c xi'npac Dios. Cuanäjni xfamil Dios. Nurnu najcnu xfamil Dios palga chanuutis sudzu'tznu lo xtiidxni, palga guibalajztisnu, palga gutiplajznu dxejli ni guibi' Jesucrist.

*Yälrusilajz xten rexpejn Dios*

- <sup>7</sup>Ni'cni, si'cpac rnü Sprit Dxi xten Dios:  
 Naj, palga jiendaajgtu xse'ni,  
<sup>8</sup>na'c gun-najdtu lastootu si'c bejn rebejn ni bidxechnäj Dios che cuansajreni lo reyubijdz.  
<sup>9</sup>Ro'c bidxechnäj retoxtadgoldootu Dios sa'csi direni nililajz Dios siädnäreni,  
 niluxh bahuiireni redzunduxh ni bejn Dios nez lojreni tiuu ijz.  
<sup>10</sup>Ni'cni laj ni cadxe'ch Dios loj rebejnğa, bejn Dios xhigab:  
 Sujiannäjreni xhigabguijdxreni,  
 dina gusanä jiu'reni xcälrusilazä.  
<sup>11</sup>Ni'cni bidxe'ch Dios lojreni,

bejn Dios te xhigabduxh,  
di rebejn̄ga jiu' te gusilaznäjni.

<sup>12</sup> Bejtznu, colnatiro andi chu tejt̄u rujn̄ xhiga-  
bguijdx, r̄lajz guibicaj lo Dios, ni nabajn̄ par tejp̄as,  
sa'csi dini chalilajz xtiidxni. <sup>13</sup> Ni'cni colgulijdx  
resa'tu guixe-guixee, laga najcni nadxej; te di chu  
tejt̄u gacnajd lastooni xcuent̄ reyäl̄rusguee xten re-  
dojl̄. <sup>14</sup> Sa'csi palga chanuunu sudzu'tznu lo xtid̄x  
Dios ni huililajznu che biembeenuni, dxejc̄ yu' xhi  
rajpnu con Jesucrist. <sup>15</sup> Si'c caj lo guijtz:  
Nadxej, palga jiendiajgtu xse' Dios,  
na'c gunnajdtu lastootu si'c bejn̄ rebejn̄ ni bidx-  
echnäj Dios lo reyubijdz.

<sup>16</sup> ¿Chu reni'cni bidxechnäj Dios che biendiajgreni  
xtiidxni? ¿La et laadi guiraa rebejn̄ ni gulää Moisés  
guedx Egipto, ä? <sup>17</sup> ¿Chuxh loj bidxe'ch Dios tiuu  
ijz lo reyubijdz, ä? ¿La et laadi reni biajb lo dojl̄,  
dxejc̄ gujtreni, huijiajbreni nez loj reyubijdz, ä?  
<sup>18</sup> ¿Chu loj räjpni dipacreni jiu' lo xcäl̄rusilajzni?  
Loj reni di nusoob xtiidxni. <sup>19</sup> Ni'c ruhuiinu di  
niajcdi niu'reni lo yäl̄rusilajz sa'csi direni nililajz  
xtid̄x Dios.

## 4

<sup>1</sup> Ni'cni palga bia'n diid̄x siu'pacnu lo yäl̄rusilajz  
con Dios, nanab jia'pnu lagajc̄ nuure didi yu' chu  
tejt̄u di gun gaan jiu' lo yäl̄rusilajzga. <sup>2</sup> Sa'csi nuure  
abiejn̄ diaagzanu diid̄x ni rusia dojl̄, sigajc̄ biejn̄  
diajg rebejn̄ga; niluxh xlia'si biejn̄ diajgreni di-  
id̄xga sa'csi bacuadiajgrenini niluxh direni nilila-  
jzni. <sup>3</sup> Luxh nuure ni ahuililaaznu siu'nu lo  
yäl̄rusilajzga; caj lo guijtz gunii Dios rediid̄xre:  
Ni'cni bidxe'chä lojreni, benä te xhigabduxh,

di rebejn̄ga jiu' te gusilaznäjreni narä.

Mase abaluuxni xtzuunni cheni birixtiejli guedxliuj. <sup>4</sup> Sa'csi loj stee guijt̄z caj diid̄x ni guniini xcuent dxej ni rusilajz bejn̄:

Xho'p dxej bejn̄ Dios xtzuunni, dxejcti basilajzni tebdxej.

Xhet bejndini dxejga.

<sup>5</sup> Stehuält guniini:

Di rebejn̄ga jiu' te gusilaznäjreni narä.

<sup>6</sup> Niluxh yu' reni gajd jiu' loj yäl̄rusilajzga, luxh reni biejn̄ diajgni diid̄x ni rusia dojl̄ di niu' sa'csi direni nusoob xtiid̄xni. <sup>7</sup> Ni'cni basoob Dios ste dxej gac “nadxej”. Gudejd xhidajl̄ ijz che gunisac Dios xcuent yäl̄rusilajz. Badeed Dios gunii toDavid rediidxre:

Nadxej, palga jiendiajgtu xse'ni, na'c gunnajdtu lastootu.

<sup>8</sup> Paru nudeed Josué yäl̄rusilajzga loj rexpeñ̄ Israel, diru Dios ninisac xcuent stee dxejre. <sup>9</sup> Naj̄ ria'nza te yäl̄rusilajz par rexpejn̄ Dios, <sup>10</sup> sa'csi nani riu' lo xcäl̄rusilaznäj Dios, rusilajzzani lo xtzuunni sigajc basilajz Dios lo xtzuunni. <sup>11</sup> Nanab chanuu gu-soobnu xtiid̄xni te jiu'nu lo yäl̄rusilajzga, te di chu tejnu ni gacnajd lajz̄ni si'c ni gucnajd lajz̄ renani di nililajz.

<sup>12</sup> Sa'csi nasesduhx̄ xtidx̄ Dios, yuduxhza xcäl̄rnibee xtidx̄ Dios. Najcni si'c te guchiil̄ ni caduxh ro'ni, räaz̄ni nez neñ̄ redzujt̄ näj̄ yojb. Sigajcza xtidx̄ Dios räaz̄ nez cadro rlia' sa' xsprit̄ näjza xaim bejn̄. Ruluiiza xtidx̄ Dios rehxigab̄ ni yu' lastoo bejn̄, näjza redzuun ni r̄lajz̄ lastoo bejn̄ gun. <sup>13</sup> Xheti xhi bencheedi Dios ni naga'tz

nez lojni. Guiralii guyasi ruhui Dios. Sajpnu gudeednu cuent lo Dios.

### *Bixhojz ni sajcru najc Jesucrist*

<sup>14</sup> Jesucrist, Xi'n Dios, najc xpixhojzpacnu ni sajcru, nani abiu' loj Dios. Ni'cni nanab chanuu sudzu'tznu chalilaaznu xtidx Dios. <sup>15</sup> Xpixhojznu ni sajcru sajc gulaslajzni nuure te di jiajbnu lo dojl, sa'csi laani sigajcza gudejdni trabajw, baquiil bendxabni te niujnni dojl, niluxh dini niujn dojl. <sup>16</sup> Riäjlpac na'c guidxeebnu cuedx-guiniabnu lo Xtiosnu ni sanälajz nuure. Na'cza guitujynu, te gulaslajzni nuure, guideb xcälracnäjni gacnäjzani nuure.

## 5

<sup>1</sup> Galooli guiraa rebixhojz ni sajcru nabee lo rebejn. Bixhojz ni sajcru rniab lo Dios xcuent rebejn. Luxh lojni rudeed rebejn regon näjza reguidxaa ni gudeedni lo Dios te jiäu lo xtojlneni nez lo Dios. <sup>2</sup> Rdejdza bixhojz trabajw sigajc benguedxliuj, ni'c sajc ga'pni yälñadolajz loj rebejn nani nayääl näjza reni abanijt lo Dios. <sup>3</sup> Niluxh sa'csi näjza laani rujnni dojl, nanab gudeedni guidxaa lo Dios te jiäu lo rextojlni sigajc rudeedni guidxaa lo Dios te riäu lo xtojlni rebejn.

<sup>4</sup> Rut sajcdi gac bixhojz xcuentcani. Dios najc ni rbejdxni te gacni bixhojz, dxejc rudeedni xpala'nni lojni si'c badeednini lo Aarón. <sup>5</sup> Si'cza di Jesucrist niajc bixhojz ni sajcru xcuentcani. Dios najc nani gulälajni gacni bixhojz ni sajcru, räjpni lojni:

Luj najclu Xi'nä, narä guleälu nadxej te guinibeelu.



<sup>6</sup> Scree cajza lo xtidx Dios stee lajt:  
Luj najclu bixhojz par tejpas sigajc gujc te niguii ni  
laa Melquisedec.

<sup>7</sup> Cheni gubajñ Jesucrist lo guedxliujre, gurejdx-  
gunabzani lo Dios, guredxa'ni biinzani lo Dios  
nani sajc nudzucajni lo yälgujt; Dios bacuadiajg  
xtiidxni sa'csi huinälajz Jesucrist Dios. <sup>8</sup> Ni'cni  
Jesucrist mase najcni Xi'n Dios bisieedni basoobni  
diidx luxh näj ni'c gudejdni trabajw. <sup>9</sup> Che  
bidzujñ dxej baluuxni guiraa redzuun ni rlaiz  
Dios gunni, laani gujcni nani rudeed laa bejñ nani  
rusoob xtiidxni lo dojl par tejpas <sup>10</sup> sa'csi Dios  
gulälajni bixhojz ni sajcro, gujcni bixhojz sigajc  
guc Melquisedec.

*Rxhunriezgw gusa'nni xcärlilajzni*

<sup>11</sup> Rlajznu guiniinu xhidalduxhru diidx xcuent  
Melquisedec, niluxh naganduxh gusule'nuni  
lojtu sa'csi nadyejctu, ditu gacbee. <sup>12</sup> Agujc  
xchej huililajztu rediidx xcuent Jesucrist. Ariäj  
gusule'tu rediidxre naj, niluxh alga rquiinrutu chu  
gusule' rediidxre lojtu stehuält, luxh rediidxre  
najc rediidx guyasi xten Dios. Agucsactu si'c  
bäz. Rlajztu yäsactu le'ch lacuaa gautu yäjt, bääl;  
nalajznu, redidxnagajn xten Dios. <sup>13</sup> Reni najc si'c  
bäz, rä' le'chtis, direni gumbesa'c redidxsa'c xten  
Dios. <sup>14</sup> Niluxh reben guyajl rajw yäjt. Sigajcza  
redidxnagajn xten Dios najc par rebejñ ni aguyajl  
lo xtidx Dios, renani ayu' xcäriejnni, arumbeereni  
nani najc dzunsa'c, nani najcza dzunguijdx.

## 6

<sup>1</sup> Nanab guisieedrunu xtidx Dios te churu

xcäriejn̄nu. Na'c guisieed̄tisnu did̄x-guyasi xcuent Jesucrist. Na'c guluiitisnu diid̄x xcuent yäl̄rusiechlajz, xcuent redzuun ni rujn rej̄t bejn̄, näj yäl̄rililajz xtid̄x Dios. <sup>2</sup> Na'c guluiitisnu xcuent yäl̄robnis, näj yäl̄rudzub̄naa yejc bejn̄, näj xcuent yäl̄rbaj̄nsac reb̄engut, näj xcuent yäl̄guxhtis par tejpas. <sup>3</sup> Alga do'o guisieed̄ru xtid̄x Dios te churu xcäriejn̄nu, palga si'c guniid̄x Dios jiennu.

<sup>4</sup> Yu' bejn̄ ni abianij xcäriejn̄ni, ni acua' reyäl̄nasa'c ni rudeed̄ Dios, ni rbäjz Sprit D̄xan xten Dios neñ lastooreni, <sup>5</sup> luxh bid̄xaglj̄zreni xtid̄x Dios näj yäl̄rnibee xten Dios ni churu jiäd̄. <sup>6</sup> Palga laareni guibisacreni lo sa' yäl̄nabaj̄n ni gojpreni galoo, diru gacdi guid̄xaa xmodreni stehuält, sa'csi d̄xejc saj̄cni si'c ni lagajc laareni gucuasacreni Xi'n Dios lo cruzjz, nalajznu susanxtujyreni Jesucrist nez loj rebejn̄. <sup>7</sup> Beñ gued̄xliuj ni biejn̄ diaj̄gni najc si'c najc yuj ni rä' nis che riajbtis nisguij. Palga yujga gudeed̄ yäl̄nasa'c loj reni rujn dzuun lojni, sunle' Dios yujga. <sup>8</sup> Niluxh palga gudeed̄ yujga ganax yaguejch näjza cuaan ni xhet saj̄c̄di, xlia'sini, suj̄n rebejn̄ gac nadeni te checni.

### *Diid̄x ni rusudzu'tz lastoonu*

<sup>9</sup> Mase rniinu scree lojtu, anaj̄nnu huililajztu xtid̄x Jesucrist näjza xtiid̄xni ni ruslaa lo dojl̄. <sup>10</sup> Sa'csi Dios najc ni rujn yäl̄guxhtissa'c, diza lajz̄ni jiäl̄ ni rujntu la'tu näj yäl̄sanälajz ni rajptu par laani che racnäj̄tu rebej̄tznu lo yäl̄rililajz, luxh guixe-guixee si'c rujntu. <sup>11</sup> Naj r̄lajznu tejgatu chanuu ga'p lagajc yäl̄rbalajzre d̄xe lultli, te gac guiraa ni cabäj̄ztu. <sup>12</sup> R̄lajznu na'c gactu bejn̄

ni rbedxitis, alga guntu sigajc bejn reben galoo, gopdzu'tzreni yälirilajz ni batipduxh lajzreni, guläjzreni te cua'reni reyäl'nasa'c ni bia'n diidx gudeed Dios lojreni.

<sup>13</sup> Luxh che bia'n Dios diidx loj toxtadgoldoonu Abram, guniini por lagajc laani sa'csi ruti stee ni sajcro lojni. <sup>14</sup> Scree gunii Dios: “Guliä sacnääluj, sunidxäza xhidajl xi'nlu.” <sup>15</sup> Cheni aguläjz Abram xchej, gusobj diidx, cua'ni nani gunii Dios lojni. <sup>16</sup> Sa'csi cheni rniliipac bejn te diidx, rniireni diidxga por laj ste'ca bejn ni sajcro lojreni, sas che rusä'treni laj bejnga xhetru yu'di xhi gunreni biey. <sup>17</sup> Rlajz Dios gacbeepac rexagdoo to Abram sisiojbpac diidx ni bia'nni che guniini loj Abram galooli. Sisiojbpac xtiidxni, sa'csi guniini diidx con lagajc lajni che bia'nni diidxga. <sup>18</sup> Ni'cni naj yu' tiop diidx ni digacdi guichaa sa'csi digacdi guinii Dios didx-xhii, rusoobpacni xtiidxni, rudeedzani yälrbedxilajz loj renani gubig-guxun lojni, loj reni sanuu loj yälirilajz xtiidxni nani abanidxni loonu por lagajc lajni. <sup>19</sup> Laa ni'cni cabääznu ni rusudzu'tz lajznu si'c duu-guiib con ancl ni rniazdzu'tz te barcw. Si'c rusudzu'tzni lastoonu te jionnu cadro yu'ni detz ladró. <sup>20</sup> Lagajc ro'c biu' Jesucrist xcuent nuure, te galooli baxhalni xnez Dios loonu, te gujcn bixhojzro par tejpas si'c gujczy bixhojz nani laa Melquisedec.

## 7

### *Jesucrist najc bixhojzro si'c najc Melquisedec*

<sup>1</sup> Galoo che gujc Melquisedec reii xten guedx Salem, gujcn bixhojzro xten Gueb Dios. Che

gubi' Abram che gulujx guer cadro bagu'tni rereii ni bidxe'ch lojni, huichagloj Melquisedecni, sas gunabni lo Dios te gacnäjru Dios Abram. <sup>2</sup> Dxejcti bejn Abram tzuu cuaa guiraa ni bejnni gaan, te badeedni tej cuaani loj Melquisedec. Laj Melquisedec säloj “reii ni runsa'c yäl\_guxhtis”, dx-ejctiru reii xten guedx Salem sälojzani “reii xten yäl\_rbedxilajz”. <sup>3</sup> Baluilojni lojreni, niluxh dinu gan chu najc xtadni, niclaza chu najc xnanni, niclaza chu najc resa'ni. Dizanu gan guc gojlni niclaza guc gujtni. Gujcnj si'c najc Xi'n Dios. Najctiszani bixhojzro par tejpas.

<sup>4</sup> Naj colhunii, lacti te beṇsa'c, te beṇro najc Melquisedec. Lojni badeed toxtadgoldoonu Abram tejga ni sajcro lo tejga tzuu ni bejnni gaan. Luxh Abram najc bejn ni sajcro lo rexpejnni. <sup>5</sup> Leii xten Moisés, rnibee xca' rebixhojz ni najc xfamil Leví te cuaa lo sa'reni si'c ni badeed toAbram loj Melquisedec, mase najcreni rexagdoo Abram. <sup>6</sup> Niluxh di Melquisedec gac xfamil Leví. Niluxh badeed Abram te cuaa xhixtenni loj Melquisedec. Dxejcti benle'ni Abram ni biannäj xtidx Dios. <sup>7</sup> Naj rut sajcdi guinii garenca, sa'csi nani sajcro runle' yejc nani guxiiru saj. <sup>8</sup> Naj rebixhojz ni rca' tejga lo tzuu ni rajpreni, najc bejn ni rejt. Niluxh rnii xtidx Dios xcuent Melquisedec ni cua' te cuaani galooli: najcni si'c te bixhojz nani nabajn par tejpas. <sup>9</sup> Ni'cni saj. guiniinu xcuent Leví nani rca' te cuaa, lagajc laani agudijx te cuaaga che badeed Abram tejga yejc tzuuga lo Melquisedec. <sup>10</sup> Sa'csi mase gajd xi'n toAbram chu che huichagloj Melquisedecni, batijpni lastooni

sa'csi abia'n diidx sudeed Dios xajgni. Ni'cni che agudijxni te cuaaga najcni si'cni suganäjni rexajgni.

<sup>11</sup> Rexpejn Israel cua' leii che gujc bixhojz relevitas, reni najc rexi'n toAarón. Paru niajc niujn-reni nibansa'c rebejn ni huisanäj leiiga, dirureni niqiuin niääd stee bixhojz ni di gac si'c Aarón, alga si'c najc bixhojz Melquisedec najcni. <sup>12</sup> Sa'csi cheni rdxaa te cuaa bixhojz nanab nājza leiiga guidxaa. <sup>13</sup> Niluxh rnii xtidx Dios, Dad Jesucrist najc bejn xten garenca famil. Luxh nicla tej bixhojz gajd gac bejn xten familga. <sup>14</sup> Huenliisi najcni Dad Jesucrist te bejn xten xfamil toJudá, niluxh di Moisés ninii gac te rexpejn Judá bixhojz.

<sup>15</sup> Luxh huenliisi najc ni rniinu, sa'csi abiricaj ste bixhojz ni najc sigajc gujc Melquisedec. <sup>16</sup> Luxh dini niajc bixhojz si'c rnii releii ni guyu' dxejc. Laani gujcnii bixhojz xcuent yälrnibee ni najc par tejpas, ni rut gacdi gutzujl. <sup>17</sup> Scree najc diidx ni gunii Dios xcuentni:

Luj najclu bixhojz par tejpas si'c gujc te niguii ni laa Melquisedec.

<sup>18</sup> Dxejcti gunijt leii sa'csi xlia'si gujcnii, di niajcdi niujn bejn si'cni rniini. <sup>19</sup> Di xleii toMoisés niujn gaan nibansa'c bejn. Naj lacuaa leiiga rajpnu te xcälirilazsa'c; ni'c rujn rbignu lo Dios.

<sup>20</sup> Dios bejn gacni bixhojz con xtidxliini, ni guniini con lagajc lajni. <sup>21</sup> Stecuaa rebixhojz gujcreni bixhojz niluxh et con didxliidire, con laj te benro, niluxh bixhojzre guc bixhojz con didxlii, con laj nani räjp:

Agunilii Dios diidx con lagajc lajni,

niluxh dini gusiech lajzni, räjpni:  
 “Luj najclu te bixhojzro par tejpas,  
 lagajc si'c gujc Melquisedec.”

<sup>22</sup> Ni'cni, Jesucrist najc ni rujn rile' rediidxre, luxh diidxre sajcruni loj xleii Moisés. <sup>23</sup> Guyu' xhidalduxh stecuaa rebixhojz, sa'csi rejtreni, digacdi chanuureni gacreni bixhojz. <sup>24</sup> Niluxh Jesucrist rajpni yälnabajn par tejpas, naj najczani bixhojz par tejpas. <sup>25</sup> Ni'c rajcza ruslaani bejn lo dojl par tejpas. Ruslaani guiraa renani rbig lo Dios por laani, sa'csi anabajni par tejpas te canabni lo Dios xcuent laareni.

<sup>26</sup> Jesucrist najc bixhojzro nani rquiinnu. Laani najc dxan, dini niujn dojl, agubicajni lo reben-dojl, huäjszani jiaaru xhaguibaa. <sup>27</sup> Dini gac si'c stecuaa rebixhojz ni nanab ju't man guixe-guixee te guze'c bixhojzroni lo Dios te ganid jiaa lagajc xtojlni. Dxejcti sajc guibi'ni guze'cnini lo Dios xcuent xtojl rebejn. Niluxh Jesucrist tejtis huält gudejdni trabajw, bejnnini cheni cuajni lo cruzj, baxhe'ni xtiejnni xcuent nuure, gujtni. Si'c gudi-jxni xtojlnu par tejpas. <sup>28</sup> Leii xten Moisés rusaan gac bixhojzro te bejn nani rejt, niluxh didxlii ni gunii Dios con lagajc lajni guleni tejni gac bixhojzro lagajc Xi'nni nani naya, nani nabañsa'c par tejpas.

## 8

### *Jesucrist najc nani rusiäjł diidx*

<sup>1</sup> Diidx ni sajcru loj rediidx ni caniinu najc scree: bixhojz ni najc xpixhojzronu agurej xladbee Dios lo xcälrdimbicha'ni xhaguibaa. <sup>2</sup> Neñ yu' ni najc dxan, neñ guidoo ni benchee Dios yu' bixhojzre,

xhet nen̄di guidoo ni runchee reben̄ lo guedxliuj.  
<sup>3</sup> Guiraa rebixhojz rajc rudeedreni goj̄n lo Dios, rajcza ju'treni guidxaa te gusejcreni lo Dios xcuent xtoj̄lreni, ni'cni nanab ga'p Jesucrist xhi gudeedni lo Dios. <sup>4</sup> Paru suga'ni lo guedxliujre, nicla bixhojz dini niajc, sa'csi yu' bixhojz ni rudeed regoj̄n si'c ni rnibee xleii Moisés. <sup>5</sup> Niluxh redzuun ni rujn rebixhojzga najc si'c te balaa xten guira'ti ni yu' xhaguibaa. Najnnu najcreni balaa sa'csi balijdx Dios Moisés cheni agojl gunni xquidoo Dios, räjp Dios lojni: “Bahuii te gunlu guira'ti si'cpac ni baluiä lojlu lo dan Sinaí.” <sup>6</sup> Niluxh xpixhojznu Jesucrist rujn dzuun ni saj cru, sa'csi najcni nani suga' galäii xnezyuj Dios loj reben̄ guedxliuj, gusule'ni diidx ni gunii Dios cheni bejn̄ni xhigabcoob, basa'nni didxcoob loj reben̄ guedxliuj. Luxh didxcoobre sacduxhruni.

<sup>7</sup> Paru niajc nusiejch leii ni badeed Dios galooli lo Moisés lajz rebejn̄, di niqiiin niujn Dios ste xhigabcoob. <sup>8</sup> Niluxh bahuii Dios xhet cayunsa'c di reben̄ guedxliuj, dxejc räjpni:

Naj rniliä sidzuj̄n redxej che gunä stee xhigab,  
 jia'n stee diidx loj rexpejn̄ Israel näjza loj rexpejn̄  
 Judá te xca'reni didxcoob.

<sup>9</sup> Xhet si'c di xhigab ni benä che bia'nä diidx loj retoxtadgoldooreni nen̄ redxej ni gunazä ñaareni te gulääreni lajdx reben̄ Egipto.

Laareni direni nusoob xtidxä ni'c basa'näreni,  
 diruna niuäreni.

Si'c gunii Dad, Gueb Dios.

<sup>10</sup> Niluxh diidx nani runä xhigab rlazä jia'n diidx loj rexpejn̄ Israel nen̄ redxejre gac scree, räjp Dad:

Sunä chu rexleia lo xcäriejnreni, sucuaäza xtidxä  
nen lastooreni.

Dxejcti narä gacä Xtiosreni, laareni gac rexpennä.

<sup>11</sup> Rut chu tejdi gului sa'ni,  
nicla bejtzni, nicla chu stee bejn gäbreni,  
“colyembee Dad”,  
sa'csi alanumbee guiraareni narä, rebäz sigajc re-  
ben\_gool.

<sup>12</sup> Narä sulaslazäreni susiaä redzundxuudx ni be-  
jnreni, diru lazä guizaj rextojlreni, nicla  
latzsiaj ni bejnreni.

<sup>13</sup> Che bia'n Dios didxcoob, diidx nani bia'nni  
galoo agujcni didx-biejw, luxh nani anajc didx-  
biejw, xhetru sajcdini.

## 9

### *Xquidoo guedxliujre näjza guidoo xhaguibaa*

<sup>1</sup> Laaca naj. Diidx ni bia'n galoo badeed leii xho  
gunreni che rajnreni Dios, näjza xho gac guidoo lo  
guidxliujre. <sup>2</sup> Guc-chee guidoo dxejcti gojl te ladro  
galäiini te gujcnio'p yu'. Yu' ni najc ganid laani  
yudxan. Ro'c suga' candilieer, näjza mex cadro  
naga' yätxtiil ni aguc le' <sup>3</sup> Ni rojp yu'ga najc dejtz  
ladro, ro'c najc yudxanduxh. <sup>4</sup> Ro'c suga' te guiib  
cadro ru' yaal. Najcni ganax oor. Ro'c yu'za te  
guijn ni laa “arco de pacto”, najcwni ganax oor,  
sigajc dejtzni, sigajcza nenni. Nenga yu' te bo't  
ganax oor. Nen bo'tga, yu' yätxtiil ni laa mana.  
Lagajcza nen guijnga yu' bar xten toAarón nani  
biga', guyu' bid lojni, näjza guij cadro bacuaa Dios  
xleii toMoisés. <sup>5</sup> Yejc guijnga caj tio'p figur oor ni  
najc si'c xangl Dios. Laareni rujn racbee bejn suga'  
Dios ro'c. Lagajc redee rusäuu con rexhigareni



cadro ruxhe' bixhojzro xtiejn guidxaa xcuent xtoj̄l rebejn̄. Ro'cti di gacdiru guiniirunu xcuentreni n̄aj.

<sup>6</sup> Che gulujx gusucheerene, riu' rebixhojz si'csi si'c neñ guidoo, neñ yudxan te rajn̄reni Dios si'c gunibee Dios. <sup>7</sup> Niluxh neñ stee yu'ga ni laa yudxanduxh, ro'c rajc riu' bixhojzrotis. Xtebtisni riu'ni, luxh tejtis huält neñ teb ijz, te chanäni xtiejn reguidxaa ni gudeedni te jia xtoj̄lni n̄ajza te jia xtoj̄l rebejn̄ ni najc xpejn̄ Israel. <sup>8</sup> Luxh guiraa reni'c rului Sprit Dxan xten Dios loonu, gajd yudxanduxh guxal che sugasijc yu' ganid, yu' ni laa dxan, cadre sanuu rajn̄reni Dios. <sup>9</sup> Guiraa ni gujc galoo najc si'c te balaa, baluini xho gacni n̄aj. Regon n̄ajza reman ni rudeedreni lo Dios direni nusansa'c xcäriejn reni rudeed gojn lo Dios, sa'csi xtiejn reman rusäutisni lo xtoj̄l rebejn̄. <sup>10</sup> Dee najc ganaxtis xhi rajwni, ni rä'ni, con yälrobni, o xhi stee dzuun ni rujn bejn̄ te ria ganaxtis tiejxhrene che guidzuj̄nli dxej cheni guchaa Dios guira'ti.

<sup>11</sup> Niluxh abiääd Jesucrist, n̄aj laani najc bixhojzro xcuent redidxcoob ni sajru n̄aj. Nacoob guidoro cadre biu' bixhojzre, nasa'cruni n̄aj. Xhet con naadi bejn̄ guc-cheeni. Dizani gac guidoo guedxliujre. <sup>12</sup> Abiu' Jesucrist cadre najcpac yu' ni laa dxanduxh, niluxh xhet xtiejndi redxib, regon; ganax lagajc xtiejn̄ni ca'ni biu'ni yudxanduxh tejtis huält, te si'c baslaani nuure lo dojl̄ par tejpas. <sup>13</sup> Reni basia xtoj̄l bejn̄ galoo najc redee: xtiejn regon n̄ajza redxib, n̄aj cobdäj xten reguidxaa ni rejc neñ guidodxanga; bastioj̄bni guiro'preni yejc reni yu' xtoj̄lni. <sup>14</sup> Palga basia redee xtoj̄l bejn̄, aticaxh xtiejn Jesucrist sajc gusia dojl̄, sa'csi ra-

jpni yäl**nabaj**n par tejpas. Lagajc laani badeedni x**tiejn**ni lo Dios. Niluxh najcni renya sa'csi dini niujn dojl, rusiazani xcäriejnmu xcuent retzuun ni xhet sajcdi, te chunu loj Dios ni nabaj**n** par tejpas.

<sup>15</sup> Ni'cni Jesucrist najc nani suga' galäii: nez lo Dios näjza nez loj reben**n** guedxliuj xcuent didxcoob. Yälgujt xten Jesucrist najc te gudzucaj**n** xtoj**l** reben**n** näjza xtoj**l** renani bejn si'cni caj lo leii, te xca' guiraa reni agurejdx Dios yäl**nabaj**n par tejpas, si'c bia'n diidx galooli. <sup>16</sup> Didxcoobre najc si'c che r**lajz** tej bejn**n** guinibee xho guidis xhix**ten**ni che agojl guet**ni**, nanab gucuaa bejn**ga** lo te guijt**z** xho guidis**ni**, dxejcti gucuaani laj**ni**. Niluxh xhet sajcdi guijt**z**ga che gajd bejn**ga** guet.

<sup>17</sup> Xhet sajcdi guijt**z**ga che nabans**ijc** nani bejn**ni**. Sajcni che agujt bejn**ga**. <sup>18</sup> Ni'cni che bia'n Dios diidx loj rexpejn**n** Israel galoo, gujt te man te bixe' rejn. <sup>19</sup> Che gulujx gunii Moisés rediidx si'c ni caj lo leii loj guiraa rexpejn**n** Israel, bagu'tni rebiser, redxib, cua'ni rejnga näjza nis, bahuajdxni guidxiil xniaa näjza te la' yajg balagbäz, hysopo, dxejcti bastiojbni rejn yejc guijt**z** cadro caj leii, näjza yejc rebejn**n**. <sup>20</sup> Dxejc guniini lojreni: “Rejnre najc seen sile'pac diidx ni abaxha**l** Dios lojtu.”

<sup>21</sup> Sigajcza bastiojb Moisés rejn guidoo näj guiraa renani r**quiin** rebixhojz che raj**n**reni Dios. <sup>22</sup> Leii xten Moisés rnibee jia guiralii con rejn, palga di rejn guixe', di xtoj**l** bejn**n** jia.

### *X**tiejn** Jesucrist rudzucaj dojl*

<sup>23</sup> Ni'cni biquiinpac gujt remanre, bixe' x**tiejn**ni te basiani reni najc xpalaa reni yu' xhaguibaa, niluxh reni yu' xhaguibaa r**quiin** guixe' x**tiejn**

te ni sajcru. <sup>24</sup> Di Jesucrist niu' nen guidoo ni benchee rebejn, ni najc xpalaa guidoopac xten Dios xhaguibaa. Laani biu'ni lagajc xhaguibaa, te laani suga'ni nez lojpac Dios te caniini xcuent nuure loj Dios. <sup>25</sup> Bixhojzro xten xpen Israel biu' nen yu' ni laa dxanduxh tejtis huält nen teb ijz, ca'ni xtiejn reguidxaa. Niluxh Crist biu' xquidoopac Dios xhaguibaa tejtis huält par tejpas, luxh ca'ni lagajc xtiejnni. Di guiquiin jiu'runi balti huält. <sup>26</sup> Palga nanab gunni si'cni rujn re-bixhojz, sajzni por niejtni te chinaduxh huält cheli birixtiej guedxliuj. Luxh naj, cheni bidzujn dxej, baluiloj Jesucrist tejtis huält, lagajc laani badeedzani xtiejnni lo Dios cheni gujtni, cuajni lo cruzj te si'c badzucajni par tejpas xtoj̄l rebejn. <sup>27</sup> Guiraa bejn nanabpac guetreni tejtis huält, dx-ejctiru sidejdreni yälguxhtis xten Dios. <sup>28</sup> Sigajcza tejtis huält badeed Jesucrist xtiejnni ni bixe' lo cruzj te badzucajni xtoj̄l xhidalduxh bejn. Luxh loj renani cabäjzni suluiilojni stehuält, xhet te gudzucajdiruni dojl, alga te gusa'ni xcälruslaa renani cabäjzni.

## 10

<sup>1</sup> Sa'csi leii xten toMoisés najctis si'c te balaa xten nani siääd naj. Niluxh dini gac si'cpac redidx-coobga. Ni'cni leii, con xtiejn reguidxaa ni rxe' cazob ijz digacdi gunsa'cni rebejn nani guibig lo Dios, sa'csi di xtiejn man gudzucajpac rextoj̄lreni. <sup>2</sup> Paru niajc nibicajpac xtoj̄l reni rudeed xtiejn guidxaa, aguläjz rudeedreni xtiejn guidxaa, sa'csi che gubicaj xtoj̄lreni, diru xcäriejnreni gumbee dojl. <sup>3</sup> Niluxh yälrejt man näj yälrudeedreni rejn casob ijz

rusnajtisreni lajzreni xcuent dojl. <sup>4</sup> Sa'csi digacdi gudzucajpac regon nájza xtiejn redxib xtojĵ bejn.

<sup>5</sup> Ni'cni che biädäd Jesucrist lo guedxliuj räjpni lo Dios:

Di rlajzlu xtiejn guidxaa niclaza regon niluxh abejnlu gacä nigui-guedxliuj.

<sup>6</sup> Dilu nichagljaz yälrejc xten guidxaa niclaza yälruceed rejn, niclaza gojn ni rudeed re-bejn te gusiani xtojĵreni.

<sup>7</sup> Dxejc räpä: “Narä basiälä te gunä si'cni rlajzlu Dad, Dios, (si'cni caj neñ reguijtz xcuent ni sacä).”

<sup>8</sup> Che gulujx gunii Jesucrist diidxga: “Di rlajzlu, dizalu guidxagljaz xcälrejt guidxaa nájza regon niclaza xcälrejc guidxaa, niclaza yälruceed rejn xcuent xtojĵ bejn si'cni caj lo leii gun bejn.”

<sup>9</sup> Dxejcti räjpni: “Narä siälä, te gunä si'cpac ni rlajzlu, Dad Dios.” Dxejc badzucaj Jesucrist nani gujc galoo, te guläxtiejni didxcoob ni bia'n Dios loonu naj. <sup>10</sup> Abasia Dios lastoonu sa'csi bejn Jesucrist si'c rlajz Dios cheni baxhe'ni xtiejn ni lo cruju tejtis huält par tejpas.

<sup>11</sup> Guiraa rexpixhojz Israel rujnreni dzuun guixe-guixee te rudeedreni lagajctis guidxaa, nájza xtiejn reman, guiraa si'ctis ni caj lo leii, niluxh reni'c digacdi gudzucaj dojl. <sup>12</sup> Niluxh Jesucrist tejtis huält baxhe' xtiejn ni lo cruju te badzucajni xtojĵ rebejn par tejpas. Naj agurejni xladbee Dios cadre rnibeeni. <sup>13</sup> Ro'c cabäjz ni guiraa ni rdxe'ch lojni te cuereni ladzni'ni. <sup>14</sup> Ni'cni tejtis huält cuajni lo cruju te basiani par tejpas guiraa renani ahuililajz xtiidxni. <sup>15</sup> Sigajcza rni Sprit Dxan xten Dios loonu; najni:

16 Diidx nani jiannääreni neṅ redxejre gac scree, naj Dad Dios: sucuaä rextidä lo xcäriejnreni, susäläza xtidä neṅ lastooreni. Dxejcti räjpni:

17 Diru lazä guizaj rextojlreni nicla rextolguijdxreni.

18 Ni'cni, cheni abia xtojḷ bejn, diru quiquiin gudeedreni guidxaa te jia rextojlreni.

### *Nanab guibignu lo Dios*

19 Ni'cni resa'nu, na'c guidxejbtu, sajc jiu'nu yudxanduxh cadro bixe' xtiejn Dad Jesucrist nani abadeedni lo Dios. 20 Naj yu' te nezyuj, nezsi-ucoob, nezyuj xten xcäl̄nabaṅcoobnu ni baxhalni che badzucajni ladroga. Ni'c säloj cheni biu'ni neṅ yudxanduxh, badeedni lagajc xtiejn̄ni lo Dios.

21 Jesucrist najc xpixhojzronu nani rnibee rexpejn̄ Dios. 22 Ni'cni do'o guibigrunu lo Dios guideb lastosa'cnu, na'c guidxejbdinu, na'cza guitujydinu. Con yäl̄rililajzpac abia lastoonu xcuent rexhigabguijdx, abidiibza tiejxhnu lo nis-ya. 23 Do'o chanuu sudzu'tznu lo xtiidxni nani huililajznu, na'c guchaanu xhigabnu sa'csi susoob Dios diidx ni bia'nni loonu. 24 Naj do'o guihuii xho jiennu te gacnäy sa'nu te si'c chonälajznu sa'nu nägajcza te jiennu ganax dzunsa'c. 25 Na'c jiennu si'c rujn rebejn̄ nani diru jääd che rdxagsa'nu. Nanab guiliidxnu resa'nu sa'csi naj asiäddzūṅgajxh dxej ni guibi' Dad Jesucrist.

26 Palga chanuu jienrunu dojl, niluxh abiejn diajgnu xtidx Jesucrist, diru gacdi guibicaj xtojḷnu dxejc. 27 Dxejcsii guidxeebtisnu guilääznu yäl̄guxhtisduhx xten Dios näj guiboo ni guze'c renani rdxe'ch loj Dios. 28 Cheni guyu' chu

tej ni di niujn si'c caj lo xleii Moisés, niluxh bidxaag xtidx tio'p o choñ ni nancheepac, räjpreni dini nusoob leii, gujt bejn̄ga, rut balaslajzdini. <sup>29</sup> Maazru yälrusacsíduxh nanab ted renani ruläj yejc Xi'n Dios cheni direni gusobdiajg xtiidxni. Alga ruṛo'nreni xtiejn̄ni ni baxhe'ni lo cruz te basianini. Rusanxtujyzani Sprit Dxañ xten Dios nani badeed didxcoob lojni. <sup>30</sup> Anancheenu gunii Dios: “Narä susquixä bejn̄; loä siguijx bejn̄”, räjp Dios. Stehuält guniini: “Dad sujn̄ yälguxhtis rexpejn̄ni.” <sup>31</sup> ;Cosduxh gac bejn̄ ni jiajb ladzṇaa Dios nani nabajn̄ par tejpas!

<sup>32</sup> Niluxh colsnaj lajztu xho gujctu galoo; cheni entis cua'tu xtidx Dios, xho batip lajztu, gudejdtu trabajw sa'csi cua'tu xtidx Dios. <sup>33</sup> Guyu' resa'tu gudéreni lojni, yu' reni basacsí la'tu nez loj rebejn̄. Guyu'za huält astoo gudejdzatu trabajw sa'csi cahuiitu rebejn̄ nani basacsíreni, cadejdzareni trabajw. <sup>34</sup> La'tu banaj lajztu renani yu' latzguiib, guideb yälrbalajz batip lajztu che cua'reni guiraa xhixtentu, sa'csi gucbeetu xhaguibaa rajptu reyälṇasa'c ni sajcru, niluxh yu'ni par tejpas. <sup>35</sup> Na'c gunijttu xcälirililajz xtidx Jesucrist, sa'csi yälirililajzga gun xca'tu yälṇabajn̄ par tejpas. <sup>36</sup> La'tu nanab cuedxitu te che abejntu ni rlañz Dios, dxejc xca'tu nani aguniini guniidxni. <sup>37</sup> Sa'csi xtidx Dios ni bia'n rñii: Asiäddzũṅajxhpc dxej ni jiädni, asiäddzũṅajxhpc dxej ni jiäd nani siäd, dipacni gaclaa.

<sup>38</sup> Renani nabañsa'c sibaññäj yälirililajz, niluxh palga yu' chutej ni guidxejb chalilajz, dini'c gun guibaa lazä.

<sup>39</sup> Niluxh nuure dinu gac si'c reni rusaan yäl\_rililajz te nitreni loj dojl. Nuure najcnu renani rililajz xtidx Jesucrist te laa xaimnu par tejpas.

## 11

### *Yäl\_rililajz*

<sup>1</sup> ¿Xhini'c najc yäl\_rililajz? Yäl\_rililajz säloj cabääznu sajcpac tejni gajd gac, yu'pacza ni mase dinu fiini, najcni si'cni abahuiinuni. <sup>2</sup> Dios huinälajz retoxtadgoldoonu sa'csi huililajzreni xtiidxni.

<sup>3</sup> Sa'csi rililajznu, najnnu benchee Dios reguedxliuj, bencheeni guibaa, bencheezani guiraa nani rhuiinu. Con xtiidxtisni bencheeni nani dinu guihuii.

<sup>4</sup> Gojpza toAbel yäl\_rililajz badzubyaalni rexquidxaani lo Dios. Yäl\_rbijbyaal xtenni saj cru loj yäl\_rbiyaal xten toCaín. Ni'cni gunii Dios najc toAbel be\_nsa'c. Naj mase agujt Abel, sanuutis racbeenu xcuent yäl\_rililajz ni gojpni.

<sup>5</sup> Sigajcza gojp Enoc yäl\_rililajz, ni'c sinä Dios Enoc xhaguibaa, guideb nabajnni, te na'c niejtni. Diru rebejn nidxälni sa'csi asinä Diosni xhaguibaa. Luxh räjp Dios xcuentni che gajd Dios jinäni, guba\_nsa'cni, baspaani lajz Dios. <sup>6</sup> Rut chu tejdi saj guspaa lajz Dios palga dini chalilajz, sa'csi che guibigni lojni, nanab chalilajzni yu' Dios, chalilajzani sudeed Dios xcäl\_nasa'cni loj renani rguuilni, nalajznu renani rlajz gumbeepac Dios.

<sup>7</sup> Gojpza toNoé yäl\_rililajz. Che räjp Dios lojni siajbpac nisguij ni gajdreni fii, huililajzni. Bejn ni si'c ni räjp Dios. Bidxejbni sa'csi najni rusooB Dios xtiidxni, ni'c bencheeni te canuduxh te di

niejt rexi'nni. Sa'csi gojpn̄i yäl̄rililajzga, bejn̄ni gubibde rebejn̄ guedxliuj, gunijtreni sa'csi direni nililajz xtiidxni. Dxejcti cua'ni yäl̄nabaṅsa'c ni siääd xcuent yäl̄rililajz.

<sup>8</sup> Sa'csi gojp toAbram yäl̄rililajz, basoobni xtidx Dios che gurejdx Diosni, biriini lajdxni te huijni cadro gudeed Dios yuj lojni te cuääzni ro'c. Biriini lajdxni, mase dini gan caro chääni. <sup>9</sup> Gojp toAbram yäl̄rililajz, ni'c huiläjzni si'c benzij̄t loj reyuj ni räjp Dios gudeedni lojreni. Ro'c guläjzreni si'c lajdx benzij̄t. Guläjzni neṅ reyuguijd, sigajcza bejn̄ toIsaac näjza toJacoob, sa'csi näjza lojreni räjp Dios gudeedni yujga. <sup>10</sup> Niluxh toAbram cayunloj te guejdx nani sudzu'tz, te guejdx nani cuäxtiej Dios, nani gunchee lagajc Dios.

<sup>11</sup> Sigajcza gojp toSara yäl̄rililajz te mase anajcni beṅgool niluxh agudejd chu xi'nni, cua'ni yäl̄rnibee xten Dios te gujcn̄i nan, guyu' te xi'nni, sa'csi huililajzni susoob Dios xtiidxni. <sup>12</sup> Ni'cni mase siäddzūṅgajxh dxej ni guet toAbram, guyu' xhidalduxh xajgni. Si'c rebalxhaguibaa näj si'c reguibäzlule' xten yujxh ni tre' ro' nisdoo, si'c najcneni xhidalduxh, nicla gac guigabreni.

<sup>13</sup> Guiraa rebejn̄re gujt, direni nica' yuj nani räjp Dios gudeedni lojreni; niluxh sa'csi rajpreni yäl̄rililajz, bahuiireni lo yujga zitro, ni'c bibalajzreni, sa'csi anajreni najcneni benzij̄t, cansajsireni lo guedxliuj. <sup>14</sup> Reni rnii si'c, rniliireni caguilsijcneni cadro gac lajdxreni. <sup>15</sup> Paru niujnreni xhigab lajdxreni najc guejdx cadro biriireni, pet niajc nibisacreni ro'c. <sup>16</sup> Niluxh laareni rlanjzreni te lajdxreni ni sajcro,



nalajznu lajdx Dios xhaguibaa, ni'c rguuilreni. Ni'cni di Dios guitujy gäbreni najcni Dios xtenreni, luxh alabencheeni guejdx cadro cuääzreni xhaguibaa.

<sup>17</sup> Gojppza toAbram yälrlilajz ni'cni cheni ba-teed Diosni preeb, räjpni loj Abram gudeedni Isaac lojni lacuaa gudeedni xhiil, cuäjbni gugu'tni xi'nni lacuaa xhiil, luxh Dios ni najc tejtis aräjp lojni galooli: <sup>18</sup> “Isaac guniidx chu xhidajl xajglu, xagdoolu.” <sup>19</sup> Sa'csi nanchee toAbram rajp Dios yälrnibee te guspajnni rebengut. Luxh si'cza cuasacni xi'nni, ascanu loj rebengut cuasacni xi'nni.

<sup>20</sup> Näjza toIsaac gojp yälrlilajz benle'ni toJacoob näjza toEsaú, räjpni xhini'c gun tejpgareni. <sup>21</sup> Gojppza toJacoob yälrlilajz, che agojl guetni, benle'ni guiro'p rexi'n toJosé. Dxejcti huistieni guzucajni yejc baston xtenni te si'c gojnni Dios. <sup>22</sup> ToJosé gojp yälrlilajz. Che agojl guetni, räjpni sirii rexpejn Israel lajdx Egipto, gunibeezani xho gunnäjreni xtzujtni.

<sup>23</sup> Gojp rexuczajn Moisés yälrlilajz, ni'c cheni gojl Moisés, bacua'tzrenini chon bäii, sa'csi bahui-ireni bäzdaanni. Direni niu xtidx reii ni gunibeeni, räjpni ju'treni báz niguii. <sup>24</sup> ToMoisés gojp yälrlilajz, ni'cni che aguroobni di rlaizni nir-ilajni xi'n xindxa'p reii xten Egipto. <sup>25</sup> Bejnni xhigab tednäjni trabajw rexpejn Dios lacuaa niujnni redzuun ni rchaglaiz rujn reben Egipto, sa'csi najc reni'c dojl, luxh tera'tsi ruspaareni laiz bejn. <sup>26</sup> Par laani maazru sajc tedni lagajc trabajw ni gudejd Jesucrist lacuaa niajpni reyäl'nasa'c xten Egipto sa'csi laani cabäjtisni reyäl'nasa'c nani

churu gudeed Dios lojni. <sup>27</sup> Gojp to Moisés yälirililajz biriini lajdx reEgipto, dini nidxejb yälrdxe'ch xten rei, huinuutis gusudzu'tzni si'cni najc xhigabni, ruhuiini loj nani di guzeṇ, nalajznu Dios.

<sup>28</sup> Gojp Moisés yälirililajz bejnni lanij xten pascw. Gunibeeni baroobreni rejn ro' xpuert rexpejn Israel te che ted angl xten yälgujt nicla te xingan galoo xten rexpejn Israel di guet. <sup>29</sup> Gojp rexpejn Israel yälirililajz gudejdreni galäii nisdoo ni laa nisdoxniaa luxh asdoo loj yubijdz rsiajreni si'c gudejdreni. Niluxh che rlajz rebejn Egipto nidejd, gubi' nis, dxejc gulo'reni neṇ nis.

<sup>30</sup> Xcuent yälirililajz gurebä'n paderguij xten guedx Jericó, cheni basa' gajdz dxej caded huält rexpejn Israel guejdxga. <sup>31</sup> To Rahab, te gunaguijdx, gojpszani yälirililajz ni'c dini niejt che gujt renani di nuzobdiidx, sa'csi laani bacua'tzni gaii bejn nani sagula'tz xho najc guejdxga.

<sup>32</sup> ¿Xhiruxh guiniä? Di galḍi guiniä xcuent toGedeón, xcuent toBarac, xcuent toSansón, xcuent toJefté, xcuent toDavid, xcuent toSamuel, näjza xcuent retoprofe't. <sup>33</sup> Guiraareni gojp yälirililajz ni'c bejnreni gaan xhidajl reguejdx, bensa'creni yälguxhtis, cua'reni xcälracnäj Dios ni bia'n diidx xca'reni, basäureni ro' rebeedz. <sup>34</sup> Guyu'reni neṇ te balduxh luxh xhet gujcdireni, gojl baxuṇreni te di niejtreni con espaad. Reni gujc beṇrdxajg, guzutzu'tzreni gujcreni nadipduxh, gujcreni beṇduxh lo gueṛ, barilaagwreni resoldaad xten reni rdxe'ch lojreni. <sup>35</sup> Guyu' regunaa ni cuasac rextogoolreni, gubaṇsacreni lo rebeṇgut.

Sgaiireni gujt xcuent yälrusacsí lacuaa nicäjbre<sub>n</sub>ni nusiech lajzreni te nuslaa bejñreni sa'csi r<sub>l</sub>ajzreni xca'reni stee yäl<sub>n</sub>abajñ ni saj<sub>c</sub>ru. <sup>36</sup> Sgaiireni gudejd trabajw guniyaj bejñreni, gudinnäj bejñreni chiir, cuaduuzareni caden, guyu'zareni latzguiib. <sup>37</sup> Guyu'za reni gujt che bacuaa bejñ guij yejcreni o che gujcreni tio'p la' con sier. Guyu'za reni basacsí bejñ te guro'nreni yäl<sub>r</sub>ililajz. Guyu'za reni gujt con spaad. Guyu' reni cuanzaj nezree nezrec, gojtreni guid-xiil näjza guid-dxib, sa'csi xhet rajpdi-reni luxh entis rdejdreni trabajw rusacsí bejñreni. <sup>38</sup> Sa' rebejñga di nungäj<sub>l</sub> reben guedxliuj niääd rebejñga lojreni. Cuanzaj rebejñga nez lo reyu-bijdz cad xhet yu'di xhi gaureni nicla nis te yäreni; cuanzajreni nez neñ redajñ, nez neñ re-biliää näj nez neñ guedduxh ni yu' neñ yuj. <sup>39</sup> Guiraa rebejñga gojp yäl<sub>r</sub>ililajz, luxh ni'cni huä'p xpala'nreni, niluxh direni nica' ni bia'n diidx gudeed Dios lojreni, <sup>40</sup> sa'csi bejñ Dios xhigab gunni te dzunsa'c lojreni. Bejñ Dios xhigab guni-idxni yäl<sub>n</sub>asa'c loonu, naj tejsi guica'nu con laareni nani bia'n diidx guniidx Dios.

## 12

### *Guihuiitisnu lo Jesucrist*

<sup>1</sup> Ni'c najcni si'cni suga'nu galäii guiraa rebejñre luxh cahuiireni xcäl<sub>r</sub>ililaaaznu. Ni'c do'o guisa'n te laad guiraa reni rusäu lo xnejznu, näjza redoj<sub>l</sub> ni ruxhiid nuure lo xcäl<sub>n</sub>abajñnu, te di jieednu chosaanu nez lo nezyuj ni sasanäänu nez cadro chonnu. <sup>2</sup> Do'o guihuidzu'tz nez loj Dad Jesucrist

nani guläxteij, nani guluuxza xcälirililajznu. Jesucrist gudejd trabajw lo cruju, dini nitujy gujtni lo sa' yälgujtgä, sa'csi najnni cheni agudejdni trabajw, sica'ni yälrbalajz; naj agurejni xladbee Dios cadro rnibeeni.

<sup>3</sup> Colujyn xhigab la'tu xho gudejd Jesucrist ladznaa reben dojl, te na'c guidxajgtu, na'cza jieedtu laj ni cabäjtuni. <sup>4</sup> La'tu gajd xtiejntu guixe' lo yälrucuanäj dojl. <sup>5</sup> ¿La abiäl lajztu xho balijdx Dios la'tu si'c xi'nni, ä? Scree caj xtiidxni lo regujtz; räjpni:

Xinä, na'c cuälazlu xcälnej Dad niclaza jieedlu che tilnejni luj.

<sup>6</sup> Sa'csi si'c runnaj Dad renani sanälajzni, rujnni rias guiraa renani rca'ni si'c xi'nni.

<sup>7</sup> Palga gatiyp lajzlu lo xcälnej Dios, sica'ni luj si'c xi'nni, sa'csi ¿chu dad di gunnaj xi'nni? <sup>8</sup> Niluxh palga di Dios gunnaj la'tu si'cni runnajni guiraa rexi'nni, ditu gac xi'npacni, najctu xi'n redolgujidx.

<sup>9</sup> Anajntu cheni gucnu biuux lo guedxliujre, bennaj xtadnu nuure te rsoobnu xtiidxni, te runsa'czanu si'cni rlajzni. ¿Xhicuent dinu cuadi-ajg xtidx xtadnu ni yu' xhaguibaa te si'c jia'pnu yäl nabajn, ä? <sup>10</sup> Xtadnu lo guedxliujre bennajreni nuure tio'p-chon dxej, te gac gusoobnu xtiidxni. Niluxh si'c runnaj Dios nuure te jia'pnu te yäl nabanya, te gac nayazanu sigajc najcni laani.

<sup>11</sup> Guliini xhet xhi yäl najdi ni rchalonu najc laaca che rsiajcnuni, racnaj tiejxhnu niluxh ria'nnu et laadi. Niluxh guiraa renani agudejd loj yäl najga rusoob xtiidxni, rca'reni te yäl nabanya ni rbecdx-ilajreni.

### *Riez guze'ni xtidx Dios*

<sup>12</sup> Ni'cni col̄sudzu'tz reñaatu ni abadxajg, col̄sudzu'tz yecxhijbtu ni abadxajg, <sup>13</sup> te col̄quiil nezyuj xten xtidx Jesucrist te sudzu'tz ni'tu. Na'c guibicajtu lo xnezyujni.

<sup>14</sup> Col̄quiil xho cuedxinäjtu guiraa rebejn. Col̄chanä te yäl̄nabanya, sa'csi renani di guibanyaadi, digacdi fiireni loj Dad Jesucrist. <sup>15</sup> Col̄huisa'c te di gunijt chutejtu lo xcäl̄racnäj Dios, col̄natiro gac chu tejtü si'c te cuanlaa ni rujn daan, sa'csi sa' bejnga suxhin̄ni guiraa renani ahuililajz. <sup>16</sup> Nicla tejtü na'c ga'p stee gunaa te laad, nungäj̄l̄ cuäznäjni chäältisni. Na'cza gactu bejn ni di jiu xtidx Dios, si'c gujc toEsaú cheni bato'ni xcäl̄nasa'cni ni najc xtenni sa'csi najcni xingan galoo xtdadni. Bato'nini te cua'ni yäl̄rajwtis. <sup>17</sup> Anajntu, cheni rlajzni niunle' xtdalnini te nica'ni ni najc xten xingangalooni, dini nica'ni mase guc-huin lajzni, binduxhni. Dxejcti diru niajcdi nica'nini.

<sup>18</sup> Col̄natiro, sa'csi la'tu di'tu nibig lo te dajn cadro rajc rsiaj bejn, te dajn ni galoo cayecduxh guiboo, cadro nacäjy, nacäiboo, cayajcza bedonduxh.

<sup>19</sup> Diza diajgtu niejn xse' trompet, xse' Dios si'c biendiajg rexpejn̄ Israel agujc xchero. Luxh che biejn diajgreni rediidxga, direni nutiplajz, gunabduxhrenei na'cru guiniini lojrenei. <sup>20</sup> (Sa'csi direni nutiplajz diidx ni caniini, räjpni: “Palga ted te mantis guläj̄ xhuj dajnga, col̄ju'tni con guij.”)

<sup>21</sup> Te yäl̄nadxebduxh najc nani guzen̄ ro'c, lagajc toMoisés räjp: “Cayacditä yäl̄rdxejb.”

<sup>22</sup> Niluxh la'tu agubigtu lo dajn xten Sión, cad najc lajdx Dios ni nabajnpac, nalajznu guedx

Jerusalén ni yu' xhaguibaa cadre yu' xhidalduxh xangl Dios, <sup>23</sup> cadre re' reni calä'p xpala'n Dios. Ro'c re'za reni najc xi'n Dios, renani acaj lajni xhaguibaa. Agubigzatu lo Diospac, ni najc Juejz xten guiraanu, näjza loj respit xten rebejn nani abasia Dios te anajcreni beñnasa'c. <sup>24</sup> Agubigzanu loj Jesucrist nani suga' galäii nez loj Dios näj beñguedxliuj xcuent didxcoob ni bia'n Dios, näjza lo xtiejn Jesucrist ni badeedni lo Dios xcuent nuure. Jesucrist rniab jäjl lajz Dios, luxh ni'c sajcro loj nani rniab xtiejn toAbel. Xtiejn toAbel rniab quiix nani bagu'tni.

<sup>25</sup> Ni'c colnatiro te di cuälaztu nani canii lojtu rextiidxni. Palga di rebejn nidedbia sa'csi gulälaz nani baluii bejn ni siädäd guedxliujre, ¿xho jiennu tedbianu palga guilälaznu nani ruluii nani siädäd xhaguibaali? <sup>26</sup> Xse' Dios basniib guedxliuj galooli, niluxh naj rnisacni: “Ste huält susnibä xhet ganaxdi guedxliuj, susnibä näjza xhaguibaa.” <sup>27</sup> Che gunii “ste huält”, ni'c säloj guibicaj renani benchee Dios ni rac rniib, te jia'n renani digacdi guiniib. <sup>28</sup> Luxh sa'csi lajdxnu ni guniidx Dios digacdi guiniibni, do'o guideed xquixtios lo Dios xcuentni, te si'c chunu loj Dios, chonälaznuni guideb yälrdxejb näjza yälradolajz, <sup>29</sup> sa'csi Xtiosnu najc si'c te balduxh ni ruse'c, ni runitlojza.

## 13

### *Xho guspaa bejn lajz Dios*

<sup>1</sup> Colchanuu lo yälrinälajz sa'ni. <sup>2</sup> Di gusaantu gudeedu rolijztu guidzujn biooz, sa'csi loj reni bejn si'c, yu'reni badeed rolijzreni bidzujn xangl

Dios rolijzreni, niluxh direni niacbee chu najczeni.

<sup>3</sup> Col<sub>s</sub>naj lajztu reni yu' ne<sub>n</sub> latzguiib, ascanu la la'tu ni yunäreni latzguiib. Col<sub>s</sub>najza lajztu renani basacsí bej<sub>n</sub>, ascanu la la'tu ni cagusacsíreni sa'csi näjza la'tu najctu be<sub>n</sub>guedxliuj si'c najczeni.

<sup>4</sup> Colga'p xpala'n yäl<sub>g</sub>uch<sub>n</sub>aa te guiba<sub>n</sub>-nayatu con chäältu sa'csi sujn Dios yäl<sub>g</sub>uxhtis rebej<sub>n</sub> ni resnä j chää<sub>l</sub> bej<sub>n</sub> näjza reni rusguee rebe<sub>n</sub>xteb.

<sup>5</sup> Na'c chanälajztu meel, col<sub>g</sub>uibalaznä j ni rajptu, sa'csi Dios agunii: “Dipacna gusanälu, dizana cuälazälu.” <sup>6</sup> Ni'c dinu guidxeb guiniinu: Dad ni yu' xhaguibaa najc ni rcanä j narä; dina guidxebä xhitis ni gunnä j bej<sub>n</sub> narä.

<sup>7</sup> Col<sub>s</sub>naj lajztu renani baluii guiba<sub>n</sub>sa'ctu, ni basule'za xtidx Dios lojtu; col<sub>h</sub>uii xho nabaj<sub>n</sub>reni te sigajcza colchanä xcäl<sub>r</sub>irilajzreni.

<sup>8</sup> Sigajc gujc Jesucrist naiti, sigajcza najcni nadxej, sigajcza sajcnj par tejpas. <sup>9</sup> Na'c gusaantu gusiejchreni lajztu xcuent ste'ca yäl<sub>r</sub>uluii ni digac si'c najc xtidx Jesucrist. Sacduxh sudzu'tz lastoonu lo yäl<sub>r</sub>racnä j ni ruluii xtidx Dios, xhet lojdi yäl<sub>r</sub>rajwtis. Xhet sajcdi rebej<sub>n</sub> nani rujntis xhigab xcuent yäl<sub>r</sub>rajw.

<sup>10</sup> Nuurnu rajpnu garenca piään, ro'c digacdi xca' rebixhojz xhi gaureni si'c ni cua'reni ne<sub>n</sub> guidoguij galoo. <sup>11</sup> Sa'csi xpixhojzro xpej<sub>n</sub> Israel rinä xtiej<sub>n</sub> reman ne<sub>n</sub> yu' ni laa dxanduxh te biäu lo dojl<sub>l</sub> xten rebej<sub>n</sub>, niluxh rize'creni xpääl remanga te laad, dejtz guejdxga. <sup>12</sup> Si'cza gujt Jesucrist te laad, dejtz guejdx, te basiani xtoj<sub>l</sub> rebej<sub>n</sub> xcuent lagajc xtiej<sub>n</sub>ni. <sup>13</sup> Naj colcho'

chonnu loj Jesucrist te laad dejtz guejdx te guideednu trabajw näjza yälxtujy si'cni gudejd Jesucrist. <sup>14</sup> Sa'csi lo guedxliujre dxunlaasinu, niluxh caguiilnu laadxnu ni chu jiäädru, te ro'c guidxunnu par tejpas. <sup>15</sup> Guideb xcälracnäj Jesucrist do'o guideedtisnu xquixtios lo Dios si'c te gojn ni gudeednu lojni, guiliä'pnu xpala'nni näj jielnu redij. <sup>16</sup> Na'cza jiällajztu guntu huen, gacnäj sa'tu, sa'csi reni'cni najc redzuun ni rdxaglazj Dios.

<sup>17</sup> Colcuadiajg xtidx reni rnibee la'tu, sa'csi laareni rcanäjreni lastoonu, si'cza laareni sudeedreni cuent lo Dios. Colyujn guibalajzreni gunreni xtzunreni, na'c gac-huin lajzreni sa'csi palga gac-huin lajzreni, xhet sajcdini par la'tu.

<sup>18</sup> Colnab lo Dios xcuent nuunu, sa'csi racebeenu naya xcäriejnnu, rlaaznu laaca jiennu guira'ti dzuun. <sup>19</sup> Rniä lojtu, guiniabrutu loj Dios, te gun Dios jiojb guibi'ä jiälä lojtu.

### *Te didxle' näj lult xtixtios*

<sup>20</sup> Dios xten yälrbedxilajz ni baspajn Dad Jesucrist lo rebengut, Jesucrist najc baxtorduxh xten rexiil xcuent rejn ni bejn gusojb didxcoob xtenni ni najc par tejpas. <sup>21</sup> Dios gun gactu bensa'c, bendxojn loj xhitis te guntu ni rlajzni, näj gunni loj guiraa nuure si'c ni rlajzni xcuent Jesucrist. ¡Colspaa lajz Jesucrist par tejpas! ¡Sugacni si'c!

<sup>22</sup> Resa'nu, rniabä lojtu, colcuedcxi lajztu, colcuadiajg rediidx ni rulijdxre, sa'csi riojbgacacuaä te labäz guiitzre lojtu. <sup>23</sup> Colyabee abirii bejtznu Timoteu latzguuib. Palga guidzungenajni ree, siädnääni jiädhuiä la'tu.



<sup>24</sup> Colgudeed xtixtios loj guiraa renani ruluii la'tu nāj loj guiraa rebejtznu ni rililajz. Rebeñ Italia ruxhał xtixtios lojtu.

<sup>25</sup> Gacnāj Dios guiraatu. Sugacni si'c.

**Xtidxcoob Dios ni biädinä dad Jesucrist**  
**New Testament in Zapotec, Mitla (MX:zaw:Zapotec,**  
**Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

**Copyright Information**

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files  
dated 29 Jan 2022

5cff1274-8dc3-5398-a94d-f6033bb363c9